



Centar za zastupanje
građanskih interesa

Obavijest za medije

(Ne)otvorenost budžetskih procesa u BiH

Objavljeni rezultati mjerenja otvorenosti 14 budžeta centralne vlasti - Najotvorenije upravljanje budžetom na državnom nivou Bosna i Hercegovine - Zapadnohercegovačka županija i Zimbabve imaju jednak stepen otvorenosti

(Sarajevo, 11.03.2013.) Danas je u zgradi Parlamenta Bosne i Hercegovine održana OBS konferencija na kojoj su prezentovani rezultati mjerenja otvorenosti budžetskih procesa. Ovim istraživanjem su obuhvaćeni državni nivo, entiteti, Distrikt Brčko i svi kantoni, ukupno 14 budžeta. Radi se o nezavisnom, uporednom i redovitom mjerenju budžetske transparentnosti i odgovornosti koje u saradnji sa organizacijom International Budget Partnership sprovode ekspertne organizacije i predstavnici civilnog društva u stotinu zemalja svijeta, a u Bosni i Hercegovini ga sprovodi Centar za zastupanje građanskih interesa - Fondacija CPI.

Gospodin Salko Sokolović, član Komisije za budžet Parlamenta Bosne i Hercegovine, u uvodnoj riječi prezentirao je rad komisije i konstatirao je da iako se u zadnje vrijeme na državnom nivou bilježe neka poboljšanja potrebno je još puno napora da se stanje značajnije popravi. Sreto Pekić, zamjenik direktora Agencije za prevenciju korupcije i koordinaciju borbe protiv korupcije istakao je odgovornost svih nivoa i svih stubova vlasti za veću otvorenost, ali i potrebu da odgovorni snose posljedice.

Aleksandra Banović, istraživačica na projektu OBS, prezentirala je metodu i rezultate istraživanja. Od mogućih 100 poena otvorenosti predviđenih Open Budget Index metodologijom, 50 poena je dobio budžetski proces Bosne i Hercegovine na državnom nivou i time se nalazi na vrhu liste otvorenosti. U svjetskim razmjerima to je isti broj poena kao Argentina, Turska, Kostarika i Gana.

Slijede ga Bosansko-podrinjski kanton sa 45 i Kanton Sarajevo sa 42 poena. Hercegovačko-neretvanski kanton i Distrikt Brčko imaju jednak broj poena, 41. U





Centar za zastupanje
građanskih interesa

sredini ljestvice nalaze se Federacija Bosne i Hercegovine sa 40 poena i Tuzlanski i Zeničko-Dobojski kanton sa 39 i Republika Srpska sa 36 poena.

Začelje predvode Hercegbosanska županija sa 35 poena, Županija posavska 34, Unsko-sanski kanton sa 27, Srednjo-bosanski kanton sa 26 i Zapadnohercegovačka županija sa 21 poenom, što je nešto manje poena nego Burkina Faso, a jedan više od Zimbabve-a, okorjele afrička diktature.

U cijelom konglomeratu problema zbog kojeg naša zemlje provodi desetljeća stojeći na mjestu ili klizeći unazad, pitanje angažiranosti građana i nepostojanja integriteta države je jedan od značajnijih. Uz ovakav stepen otvorenosti upravljanjem milijardama državnog novca, nije čudno što se građani ne uključuju u budžetske procese i prepuštaju političkim elitama da neometano provode svoje zamisli. Zauzvrat, državne vlasti nemaju nikakvo povjerenje građana bez kojeg ne mogu provesti nikakve reforme.

Detaljne infografike našeg istraživanja možete downloadirati na slijedećem linku
<https://www.dropbox.com/s/d3e11734j4erhio/OBI%20-%20prezentacija%20%282%29.ppt>

Za dodatne informacije molimo kontaktirajte našu saradnicu Amru Bilalović, mob br 061 683 032, ili na email: amra@cpi.ba.

CPI je nevladina, neprofitna organizacija koja prikupljanjem, analizom i objavljivanjem podataka od interesa za građane, te njihovom promocijom, aktivno podržava izgradnju civilnog društva. Fondacija CPI nastoji omogućiti da javni i verificirani podaci važni za građane BiH budu lako dostupni u kontekstu i na način kojeg može razumjeti građanin koji se profesionalno ne bavi javnom administracijom i javnim finansijama.

